

Rahasia di Sebalik Tafsir HAMKA yang Membumi di Tanah Melayu

written by Harakatuna

Setiap tafsir mempunyai kelebihan masing-masing. Namun [tafsir Hamka](#) ini adalah tafsir yang paling dekat di hati orang Melayu. Di Malaysia, nama [Hamka](#) selalu hadir dalam perbincangan akademik dalam pelbagai peringkat, seperti forum dan seminar. Dalam peringkat penulisan akademik pun tidak kalah kurang. Sudah banyak tesis dan disertasi yang dihasilkan melalui penulisan terkait dengan Hamka dan tafsirnya. Orang Melayu di Malaysia mengatakan, “Tafsir Hamka adalah tafsir Melayu”. Walaupun tafsir Al-Misbah karya Prof Dr Quraish Shihab tidak kalah bagus, namun orang Melayu di Malaysia lebih kenal tafsir Hamka berbanding tafsir Al-Misbah. Kini, bukan hanya tafsir Hamka yang diulang cetak di Malaysia, tetapi hampir semua novelnya sudah dicetak ulang dengan bahasa Melayu.

Menurut penulis, tafsir Hamka ini mudah dan tidak terlalu banyak bermain dengan perkara-perkara bahasa yang rumit. Makna Al-Quran langsung dicerna oleh pembacanya tanpa banyak disibukkan dengan perkara-perkara tafsir yang berkaitan dengan bahasa Arab Al-Quran. Selain itu, membaca tafsir Hamka sama seperti membaca peribadi Hamka dan kehidupan yang telah dilaluinya. Hal ini kerana contoh-contoh yang disebutkan Hamka dalam tafsirnya ketika menjelaskan makna ayat merupakan kejadian yang berlaku di alam Melayu, khususnya di Indonesia ketika itu, bahkan terkadang contoh itu adalah dirinya sendiri dan keluarganya.

Keutamaan dan Rahasia di Sebalik Tafsir HAMKA

Seterusnya, tafsir Hamka bergenre *tafsir al-Aqli al-Ijtima'i* yang banyak menyelesaikan konflik sosial-politik masyarakat Islam di Indonesia ketika itu, seperti komunisme, pengaruh budaya penjajah dalam pelbagai bidang kehidupan termasuk pendidikan serta kemiskinan. Perkara yang sama juga dihadapi oleh saudara Muslim di Tanah Melayu Malaysia. Oleh itu, tafsir Hamka dapat diterima luas oleh masyarakat Melayu, khususnya di Malaysia. Selain itu, tafsir Hamka

tidak pernah dikaitkan dengan isu-isu pemikiran yang menyimpang seperti Syiah sehingga orang tidak ragu-ragu terhadap kandungan tafsir Hamka.

Kemudian, tafsir Hamka ibarat ensiklopedia ilmu yang menampakkan sosok Hamka sebagai ilmuwan yang menguasai banyak bidang ilmu seperti sejarah, tasawuf, sosiologi, antropologi dan banyak lagi ilmu yang berkaitan. Membaca tafsir Hamka sama seperti berlayar di lautan ilmu. Oleh itu, wajar dan sungguh sangat layak jika Hamka mendapatkan gelar Doktor kehormatan dari Universitas Al-Azhar pada zaman Syeikh Mahmud Syaltut (1893-1963).

Ringkasnya, tafsir Hamka mencerminkan budi bahasa dan pekerti orang Melayu yang sopan dan beradab serta menjunjung tinggi nilai-nilai ilmu. Inilah yang menjadi rahasia besar di sebalik penerimaan yang meluas daripada masyarakat Melayu terhadap tafsir Hamka.

Dr. Muhammad Widus Sempo, Dosen Senior (Senior Lecturer) Fakulti Pengajian Quran dan Sunnah, Universiti Sains Islam Malaysia (USIM) E-mail: muhammadwidussempo@gmail.com dan widus81@usim.edu.my